

西安縣志

卷卅六人物錄墾荒
列女

卷卅七人物錄方技

卷卅八

拓

同安縣志卷之三十六

墾荒錄附華僑

開疆闢土能以國家勢力拓殖民地此史策之光榮也曠觀中外大勢若朱成功之兩臺灣華盛頓之啟美莫不播爲美談傳爲盛事英一荒島耳而屬地幾六十所墾闢之舉烏容已耶以我國生齒之繁又須廣拓殖民如黃帝逐苗於江淮庶幾足固吾圉同邑屬濱海區民生其間多嫻水性我先民生聚教誨戶口日增以生計困難冒險出洋啟荒遠之區披榛斬棘以擴利源或開文化或闢商埠雖國力不能撫墾而若吾民之耐苦性固足勤遠略也秉國鈞者而能發揮光大以強我民族則以之收殖民地指顧閒耳是不可以無志志墾荒而以華僑附我民族其深念之哉

明 陳永華 洪 旭 王世傑 林 圯

清 李 尙 曾國詰 歐陽天送 許判生 林占梅 鄭崇和

彭培桂 李春生 林 豪 倪 湜

峇眼 洪思返 思艮 思沐 志魁 爾城 爾藩 思柱

思扱

爾擇

爾泉

允源

思燃

爾帆

志用

爾可

志近

爾彰

文夜

爾棧

華僑

曾媽庇

杜文良

陳伯屋

陳謙善

柯祖仕

黃志信

明

陳永華字復甫父鼎以教諭徇國難永華方舞象試冠軍已補弟子員聞喪歸奉母以逃城陷數日乃爲掩骼僧入城求父屍於敬一亭負歸殮葬遂棄儒生業究心天下事當是時招討大將軍鄭成功開府思明謀恢復延攬天下士兵部侍郎王忠孝薦之成功接見與談時事終日不倦大喜曰復甫今之臥龍也授參軍待以賓禮永華爲人淵冲靜穆語訥訥如不能出而指論大局慷慨雄談悉中肯要遇事果斷有識力定計決疑不爲群議所動與人交務盡誠平居燕處無惰容布衣疏飯澹如也永歷十二年成功議北征諸將或言不可永華獨排之成功說命留思明輔世子嘗語經曰陳先生當世名士吾遺以佐汝汝其師事之十五年克臺灣授諮議參軍經立軍國大事必諮問焉十八年八月晉勇衛親歷南北各社相度地勢既歸復頒屯田之制分諸鎮開墾插竹爲籬斬茅爲屋以藝五穀土田初

闢一歲三熟戍守之兵衣食豐足又於農隙以講武事故人皆有勇知方先公而後私東寧初建制度簡陋永華築圍柵起衙署教匠燒瓦伐木造廬舍以奠民居分都中爲東安西定寧南鎮北四坊坊置簽首理庶事制鄙爲三十四里里有社社置鄉長十戶爲牌牌有首十牌爲甲甲有首十甲爲保保有長理戶籍之事勸農桑禁淫賭詰盜賊於是地無游民番地漸拓田疇日啟其高燥者教民植蔗製糖之利販運國外歲得數十萬金當是時閩粵逐利之氓輻輳而至歲率數萬人成功立法嚴永華以寬持之險阻闢物土宜臺灣之人以是大治十二月請建聖廟立學校經從之擇地寧南坊二十年春正月成經行釋菜之禮三月爲學院以葉亨爲國子助教聘中土之儒以教秀士各社皆設小學教之養之臺灣文學始日進永華旣教民造土歲又大熟比戶殷富猶恐不足國用請經令一旅駐思明與邊將交驩彼往此來以博貿易之利而臺灣物價大平二十八年春耿精忠據福建請會師經以克壑爲監國命永華爲東寧總制使克壑永華婿也事無大小皆聽之永華爲政儒雅轉粟餽餉軍無缺乏及經歸後頗事偷息而馮錫範劉國軒忌之三十四年春三月請解兵經不聽旣而許之以所部歸國軒永華見經無

西志諸將又燕安相處鬱鬱不樂一日齋沐入室拜禱願以身代民命或曰君秉國鈞民之望也已復歎曰鄭氏之祚不永矣越數日逝經臨其喪諡文正贈資政大夫正治上卿臺人聞之莫不痛哭馳弔於家初經知永華貧以海舶遺之商賈儼此貿易歲可得數千金不受而自募民闢田歲收穀數千石比穫遍遺親舊之窮困者計其所存僅供歲食而已妻洪氏小字端舍賦質幽閒善屬文晨興盥沐畢夫婦衣冠歛衽揖而後語一家之內熙皞如也合塋於天興州赤山堡大潭山清人得臺後歸塋同安子夢球居臺蕃衍至今爲邑望族

參雍正舊志府志臺灣通史

洪旭字念衷公掄子也甲申之變福王卽位江左二年鄭鴻逵黃道周共迎唐王監國福州改元隆武旭以軍功得官爲鄭成功所重唐王陷汀州清師至貝勒博洛誘芝龍成功獨悲歌慷慨謀起師聲淚俱下旭與陳輝張進施琅陳霸九十餘人從之斷纜行收兵南澳旋據金廈奉永明王正朔永歷九年進旭爲水師右軍十二年成功謀大舉進取金陵以旭爲兵官陳泰爲戶官留守金廈成功所向克敵鎮江屬邑皆下清廷大震旋以規畫南京失利窮蹙兩島遂取臺灣以旭留守有功累官中提督封太子太師忠振伯成功卒降將施琅黃梧分道進攻金廈耿李

各濟師鄭軍不敵退守銅山洪旭言曰金廈新破銅山難守不如退守東都以待後圖經從之至澎湖乃與宗室寧靖王瀘溪王巴東王魯王世子及鄉紳王忠孝辜朝薦盧若騰沈佺期郭貞一李茂春巡視諸島旭曰澎湖爲臺灣門戶上通江浙下達南洋必須建設重鎮以固海疆若澎湖有失則臺灣無所措手足乃建壘媽宮左右峙如築礮臺煙火相望令薛進思戴捷陞守之十九年正月經聞施琅疏請攻臺集諸將議旭曰前者荷人失守恃其礮火馮其港道而不防備澎湖故我先王一鼓而下夫澎湖爲東寧門戶無臺灣是無東寧也今宜建築安平礮臺以礮船十隻防守鹿耳別遣一將鎮澎湖嚴軍固壘則敵不易渡也經曰善乃以楊祥守鹿耳顏望忠守澎湖施琅調兵攻臺果不克清遂召琅歸北京二十年建聖廟經率文武行釋菜禮廣設學校旭諫曰有文事者必有武備今施琅雖出軍未定而心不忘我當訓勵將士以待其變經復命各鎮以時操演旭以勞疾卒經親爲治喪以其子磊爲戶官

參留庵文集
臺灣通史

王世傑由邑往臺爲賈旣得墾田之令集泉人數百十人至斬茅爲屋先墾竹塹社地就番田而耕之引水以溉歲乃大稔其地卽今縣治之東門大街以至暗仔街

也已又墾西門大街至外棘脚治田數百甲縣治一帶鋤耨畢集世傑旣以力田起家又與番約互市墾務日進康熙五十餘年始墾濱海之地曰大小南勢曰上下羊藔曰虎仔山曰油車港曰南莊凡二十有四社爲田數千甲歲入穀數萬石旣又墾迤南之地曰樹林頭曰後湖莊曰八卦厝曰南雅曰金門厝曰姜藔曰北莊凡十有三社當是時新竹尙未設治諸羅政令僅及半線大肚吞霄諸處山川奧鬱水土苦惡南嶽淡水窮年陰霧罕晴霽鄭氏以投罪人康熙四十有九年始設淡水防兵及期生還歲不能三之一巡哨未有至者世傑獨苦心孤詣蒙苫蓋暴霜露胼手胝足與佃農共甘苦故來者日衆世傑悉命田芋而給其資用以織褐故新竹產芋特盛世傑卒而其子以折產構訟家道遂衰惜哉

林圯銅魚館人爲延平郡王部將歷戰有功至參軍從入臺及經之時布屯田制圯率所部赴斗六門開墾其地爲土番游獵土沃泉甘形勢險要圯至築棚以居日與番戰拓地至水沙連久之番來襲力戰不勝終被圍食漸盡衆議出圯不可誓曰此吾與公等所困苦而得之土也寧死不棄衆從之又數日食盡被殺所部死者數十人番去居民合葬之以時祭祀名其地爲林圯埔

論曰開闢之功大矣哉林圯埔在嘉義東北背倚層巒右控濁水居民數萬大都林氏子孫讀書力田饒有堅毅不拔之氣是豈非圯之所遺歟光緒十四年始建縣治於此名曰雲林志圯功也越五年從知縣李烜之議移斗六而林圯埔之繁盛猶故夫天下無失敗之事而千古有必成之業圯之初拓斗六門也斬荆棘逐豺狼經營慘淡未嘗一日安處乃又爲番所迫身死衆亡則圯亦自怨其敗矣然圯沒未久黨徒繼進前茅後勁再接再厲而昔日跋扈之番竟降伏於我族之下日月也由我而光明山川也由我而亭毒草木也由我而發揚則圯應又歎其成矣大雅之詩曰立我蒸民莫非爾極我同胞其念哉

清

李尙在坊人以雍正六年往墾後湖田九厝車路頭凡數年而告成

曾國詰在坊人以雍正三年開墾新莊仔越二年再墾員山頂崁頭厝等莊

歐陽天送廈門人以雍正十年拓大莊竣新厝地

許判生在坊人以雍正十一年與溫明鼎合墾坡仔頭下崁仔脚拔仔脚

林占梅字雪村號鶴山始祖三光以明季東渡居臺南府治樣子林後遷竹塹祖紹

賢墾田習賈復辦全臺鹽務富冠一鄉有子七長祥瑞生占梅占梅少穎異讀書知禮無紈袴氣性豪邁好交名下士濟困扶危糜萬金不少惜道光二十二年英犯雞籠沿海戒嚴倡捐防費得旨嘉獎遂以貢生加道銜二十三年防堵八里坌口又捐鉅款事竣以知府卽選二十四年嘉彰械鬪募勇扼守絕其蔓延賞花翎咸豐三年林恭亂臺鳳北路震動會道員辦全臺團練又捐津米三千石奏簡浙江道四年艇匪黃位踞雞籠以克復功加鹽運使同治元年春彰化戴潮春起事境內土匪竊發民心惶惑占梅知獨籌維危局卒無害初潮春設八卦會勢日盛占梅知其必發備器械修城濠守要害部署甫定警報遽至咸議斂財通款以緩其來或言棄城走占梅獨排衆議曰淡水爲財賦之區彼必來爭卽令行賄安能保其不至既至而又何如我能往彼亦能往走將安之耶今與諸君約不如以通款之資爲戰守費其濟諸君之功不濟吾以死繼之衆曰諾占梅卽以家資十數萬爲餉糈城中紳商亦踴躍輸將於是以張世英權廳篆率衆設誓願共存亡民心始定二年春勇首蔡宇克牛罵頭梧棲等處占梅策也梧棲爲通海埤殷商聚集占梅以其可進規化遂取之世英亦由內山首尾相應十一月與官軍會攻南

門遂復彰化事聞加布政使銜旋召見以病辭遂不出占梅工詩書精音樂軍興時文移批答多出其手暇則彈琴歌詠若無事然築潛園結構甚佳知名士多出入其門文酒之盛冠北臺著琴餘草八卷

臺灣通史

彭培桂字遜蘭少隨父游臺居淡水據榔莊咸豐六年以覃恩貢成均設教於鄉及門多俊士竹塹巨室爭聘之著有竹裡館詩文集子廷選亦能文道光二十九年拔貢朝考一等請降教諭巡道徐宗幹賞之曾選其文刊於瀛洲校士錄著傍榕小築詩文稿未刊今皆散失

鄭崇和字其德號怡庵金門人年十九往臺課讀於淡水廳竹塹遂家焉淡爲新闢之地民少讀書崇和勸勵之富家子弟多就學奉師厚故修脯亦豐嘉慶十年蔡牽犯淡水土匪竊發崇和適在後壠奉檄募鄉勇防守事平當道嘉之淡屬閩粵雜處分類械鬪歷年不息崇和又奉檄彈壓召兩造父老力陳利害仇始解竹塹多山野土番輒出殺人歲且數十崇和乃集壯丁據形勢鳩資設隘以保衛行人樵蘇便之二十年歲飢發粟平糶是時竹人士議建文廟崇和慨然出巨款命次子用錫董工廟成行釋菜禮竹塹文風之盛始此崇和好宋儒書尤守紫陽家訓

及門之士多達材道光七年卒年七十有二九年邑人請祀鄉賢祠十二年詔可次子用錫亦有名

李春生廈門人家貧年十五學英語間讀報紙遂得知外國大勢同治四年游臺爲淡水寶順洋行買辦淡水爲臺北互市之埠出口貨以煤腦米茶爲大宗而入口則煤油布疋春生懋遷其間商務日進先是英人德克以淡水之地宜茶勸農栽種教以焙製之法以是臺北之茶聞內外春生實輔佐之既而自營其業販運南洋美國歲率數萬担獲利多光緒十三年臺灣建省巡撫劉銘傳暫駐臺北乃於城外大稻埕新闢市廛而規模未備春生與富紳林維源合築千秋建昌二街略仿西式爲民倡洋商多僦此以居十六年設蠶桑局以維源爲總辦春生副之種桑於觀音山麓未成而銘傳去事中止十七年臺北鐵路成以功授同知賞戴花翎春生雖居閩閩而盱衡時局每思變法自強蓋有心人也

臺灣通史

論曰朱成功建國臺灣賴漳泉人之啟闢爲多今考臺灣通史所載實吾邑諸先民左之右之披榛斬棘以有今日延至清季甲午中日肇衅敗衄喪師日人竟有索臺灣之舉當是時全臺百萬生靈槌胸泣血無可如何締造垂二百年割棄僅

一二日嗚呼慘矣屆今越三十年矣我國人曾念諸先民之蒙苦蓋暴霜露鼓其勇氣以拓大版圖之艱難困苦乎夫荷蘭一小國耳尙能闢爪哇以守疆土況我民族之光大乃有土地人民而不能安撫耶積愧生奮是有望於後之自強者

林豪字卓人金門人博覽史籍能文章咸豐九年領鄉薦同治元年秋至臺灣居艋舺時彰化戴潮春起事林占梅奉檄辦團練見而禮之延主潛園相與討論文史及平豪游府治因就見聞所及撰東瀛紀事二卷六年淡水同知嚴金清聘修廳志淡自設廳以來尙無志前鄭用錫曾輯志稿二卷多疏略豪乃與占梅商訂體例開局採訪凡九月成書十五卷未刊而陳培桂任同知別延候官楊浚修之浚乏史識多改竄豪大憤撰淡水廳志訂謬以彈之嗣就澎人士聘主講文石書院又輯澎湖廳志稿存臺南光緒十八年臺灣議修通志各廳縣皆有採訪而澎自法役之後建設尤多通判潘文鳳乃再聘豪成之凡十四卷上之大府豪以金門人久游臺灣凡國計盈虛民生利弊皆有所論而於澎事尤關切後歸著書以老論曰臺澎爲新開化之地我邑諸先民以文學武備農商工業經營締造垂二百年今讀臺灣史恍然於當日人材之盛也乃未幾而淪於日本痛哉

倪湜字少梅號隱叟年十二卽通經爲文有奇氣顧兩應童試見擯于有司兼以父死家貧遂輟業遊幕東渡後迭就提鎮參遊及府縣之聘嘗就台防廳袁聞柝幕時有生番戕官袁奉令勦辦湜隨軍參襄戎機事平以功叙從九歸部選乙酉援例指分廣東壬辰任文昌縣舖前分司甲午夏復署澄邁縣捕衙再任儋州吏目旋代理正堂性嗜吟咏顧不甚愛惜吟成隨手棄置由湜子抄錄成秩名曰浪游隨筆及吟稿未刊晚歲歸隱以疾卒

峇眼亞比之開漁業

峇眼亞比荷蘭屬地荒土也清同治間翔風十三都洪思返洪思良洪思沐洪志魁洪爾城洪爾藩洪思柱洪思扱洪爾擇洪爾泉洪允源共十一人在洋業漁於風順帆轉之時遙望火光燭天咸以爲異冒險尋至其地見山川秀麗魚蝦充滿因築草廬其間以收漁利海產之多爲外洋冠後獲利漸豐以次建築屋舍人煙稠密戶口數萬遂成貿易市區是地開墾由邑人航海尋得之荷蘭人謂火曰亞比因名其地曰峇亞比

赤礁吧之建設市場

赤礁吧亦荷蘭屬地近水連山可以業漁翔風里厚平人洪思燃洪爾帆洪志用洪爾可洪志近航海至其地開埠市場遂成商埠漁利之饒人口之多與峇眼埇

鹽水港之闢商港

鹽水港荷蘭荒地十三都人洪思拔洪爾彰洪文夜洪爾棟素業漁舟行到此見此地闢其無人手創經營至十餘年遂爲我國人在外貿易之港良由邑人素嫻水性勇於冒險遂能開闢港汊以廣謀生之路所惜國權不能馭遠仍須託庇外人爲憾事耳

上三節洪紫庭訪稿

論曰漳泉之民自明季多航海外洋以謀生計清乾嘉時意欲閉關自治嚴下令禁有出洋者罪之而吾民卒冒險涉歷艱難締造越萬里長洋創設商港及各項實業迄今歐美各國皆我國人足跡所經華僑之聲譽遂爲政府所垂意蓋吾民之耐苦性固外人所嘉許也有是百姓而政府不能發揮而光大之惜哉

華僑

曾媽庇又名廣庇安仁里曾營人少失怙家貧母老年十四卽赴外洋檳嶼操航海業不利嗣渡緬甸以篤信勤樸爲人信服經營二十餘載獲貲三千餘萬性至孝

問母所欲母曰吾家素貧深知疾苦但願汝以多金周鄉鄰之急於頗足矣庇隨匯款給貧人以博親歡宣統辛亥倡設鄉學校題款二萬員爲基金民國成立以國家需財在緬募捐十五萬并自捐一萬共十六萬員解京經袁總統世凱獎給以二等純金徽章又贊助省都督孫道仁以維持費募捐自捐亦達數萬四年復出貲三萬建築鄉女校并基金廈設家族龍山學校慨輸七千餘金爲建築費繼又擔任常年費一千四百四十員同安醫院成立又慨助二萬五千金此報效祖國之大略也在緬甸則建設中華學校以育人材購置曠地以作義塚動費數十萬金無論中外有募辦公益者媽庇悉踴躍輸將每歲必給發多貲以惠窮黎故里中多愛戴之卒於民國九年時年七十四歲子三祖來祖慨祖彪皆英偉克成父業

杜文良字子山安仁里黃庄人翰子十歲而孤家貧日與弟塗採薪種地瓜以供母弱冠因謀生不易菽水難以盡歡乃蓄數百錢爲旅費至廈由帆船渡英屬緬甸經商年三十始歸而受室性慷慨好施賑及修橋造路凡有善舉輒獨立肩之雖巨貲不惜也偶不敷用輒稱貸於人而償其息恒達數萬金無所吝計自光緒丁

亥至戊申善舉費至三十餘萬金以上自奉甚薄儉約如常人晚歲喜母享遐齡思有以博其歡乃獻玉佛於慈禧皇太后蒙恩誥贈父母祖父母以二品封典其孝行足稱有如此者光緒戊申興泉永道周蓮贈錫類推仁匾額已亥五月李傅相鴻章以賑災奏獎文良以樂善好施在籍建坊年七十卒子成智熱心公益頗有父風曾被舉爲灌農會會長

事實另詳建
築志延香採

陳伯屋字伯富陽翟人少貧比壯抵安南營布商及染料四十餘年獲利二十萬金先後捐助陽翟學校建築費及常費三千六百元由巡按使許世英獎給銀質一等褒章詳請教育部獎給金質二等褒章并呈請大總統頒賜敬教勸學匾額卒

年七十五

陳延
香採

陳謙善名最以字行別字報三號樂峰仙岳鄉人少岐嶷年舞勺卽附海舶往呂宋比壯便信義孚中外日斯巴利亞之官舉以爲華人長乃彼語所謂甲必丹者旣任事卽以利華人爲己任日例苛凡華人進口路照諸費率多濫索或違其禁輒銀鐺供役辰出西歸隨以鞭撻凌踐而死者無算洋兵驗身稅紙每肆意枉辱民多不堪且華醫有禁華藥有禁觸手羅網謙善隨事與爭不少屈必輕必獨而後

止華僑賴之以安性耿直好面折人過同旅華衆無慮十萬數或有爭執經謙善就是非判決立解華人或窮不能完身稅例以苦役代贖緩其老病顛連者又率流落不得歸謙善輒爲納稅給費俾居者不困歸者有資歲恆糜千金無所吝又慮旅日病民之窮瘁也倡中華崇仁醫院以蘇之慮防疫之苛酷也設華民防疫所以妥之慮旅骨之無歸也創中華義塚以瘞之抑英德布商之氣而市易生色活宿務難民之命而流離再甦義聲令問喑喑然播人口美利堅得小呂宋我總署以謙善習其風土華洋交推電派署理該地總領事謙善感激圖報凡可以利桑梓報國家者或糜己費或集衆款有義必赴甲午中東之役助餉千金總署奏獎花翎四品銜山東順直災復各輸千金賚建樂善好施坊庚子閩滂倡捐鉅款并鳩集數萬金備賑得一品封典晉光祿大夫以子綱貴封三品銜四品京銜內閣漢票籤中書刑部陝西司郎中以光緒辛丑卒於小呂宋邸第年五十有八子綱以邑諸生中式光緒甲午舉人戊戌捷南宮援中書改郎中學習於刑部陝西司旋由總理衙門王大臣奏派駐紮小呂宋總領事再調授古巴總領事

節陳榮仁撰墓誌